

**BOSNA I HERCEGOVINA
FEDERACIJA BOSNE I HERCEGOVINE
SREDNJOBOSANSKI KANTON/KANTON SREDIŠNJA BOSNA
OPĆINA JAJCE**

**Radna grupa za provođenje javne rasprave
u predmetima dodjele koncesija**

Broj: 05-23-1762/16

Datum: 24.03.2016. godine

PREDMET: ZAPISNIK SA JAVNE RASPRAVE ODRŽANE 24.03.2016. GODINE

U skladu sa odredbama Zakona o koncesijama SBK/KSB ("Službene novine SBK/KSB" br.8/09) postupajući po zahtjevu privrednog društva „ELGRAD“ d.o.o. Jajce, Radna grupa je provela javnu raspravu za izgradnju male hidroelektrane na rijeci Vrbas te o tome sačinila

ZAPISNIK

Predmet koncesije: Izgradnja mHE Vinac, 1,5 MW na rijeci Vrbas

Investitor: "ELGRAD" d.o.o. Jajce - Vinac

Vrijeme javne rasprave: 24.03.2016. godine sa početkom u 11:00 sati.

Mjesto održavanja javne rasprave: Općina Jajce, velika sala Općine

Prisutni:

1. Ispred organa uprave na osnovu Rješenja Općinskog načelnika Radna grupa za provođenje javne rasprave u vezi davanja prethodne saglasnosti u predmetima dodjele koncesija u sastavu:
Senad Dizdar – predsjednik,
Zorica Marić – član i
Selmir Avdić – član
2. INVESTITOR „ELGRAD“ d.o.o. Jajce i predstavnici projekatanta -4 predstavnika
3. predstavnici zainteresiranih građana – 38 sa popisom u listi prisutnih lica koja je sastavni dio ovog zapisnika.

Javnu raspravu je otvorio i vodio predsjednik radne grupe Senad Dizdar, te prisutne upoznao sa obavezama proisteklim iz Zakona o koncesijama SBK/KSB, koje se između ostalog ogledaju u tome što je neophodno da se provede postupak javne rasprave prije donošenja prethodne saglasnosti od strane Općinskog vijeća Općine Jajce.

Javna rasprava je održana na osnovu podnesenog zahtjeva od strane privrednog društva "ELGRAD" d.o.o. Jajce

Investitor je predstavio projekat te tom prilikom iznio sljedeće:

Gospodin Edhem Bičakčić u ime predstavnika projekatanta. Pozdravio je sve prisutne i zahvalio se svim prisutnima koji su se odazvali u velikom broju, te pozdravio što može iznijeti obrazloženje predstudije izvodljivosti. Kazao je kao u BIH se može napraviti oko 600 malih hidroelektrana ali da je svega izgrađeno svega oko njih 50.

Što se tiče izgradnje male hidroelektrane u Vincu to je zapravo obnova i rekonstrukcija nekad postojeće koja je postojala do 60-tih godina prošlog stoljeća koja je proizvodila

proizvodila električnu energiju do izgradnje HE Jajce I i JAJCE II. Investitor je firma iz Jajca "ELGRAD" d.o.o. Jajce koja ima iskustva jer je u Jajcu već nekoliko mikropostrojenja napravila, znani su u ovoj oblasti i imaju licencu. Ovdje se radi o maloj hidroelektrani na velikoj rijeci, gdje su projektanti morali iskoristiti veliku vodu a maleni pad. Vrbas je velika rijeka i svaki zahvat na takvoj rijeci je svakako veliki projekat. Ovdje su prisutni i glavni projektanti. Muhamed Durača on je sa licencom za projektiranje ovakvih objekata i iza njega je već 25 projekata ovakvih mHE. i Dženan Vilošija inženjer elektrotehnike koji će slušati vaša pitanja i odgovarati na njih. Također dodaje da je ova mala mHE je smještena u centru Vinca i ovakvi projekti su česti (pogotovo u Austriji, Češkoj). Proticaj Vrbasa u Vincu je 23 kubika to je srednji godišnji proticaj a instalacija je 32 kubika, to je projektantsko rješenje koji omogućava da se koristi veliki dio voda. Instalacija je 32 kubika a raspoloživi pad je 5,5 metara, znači otprilike je tri metra iznad brane a dva metra ispod brane čišćenje i uređenje korita. Na tom padu bile bi 4 mašine i ostvarila bi se snaga od 1,5 MW i ta snaga bi godišnje napravila oko 7,25 miliona kilovat sati električne energije.

Ukupna investicija se sada procjenjuje na 4,5 miliona KM pri čemu je udio građevinskih radova oko 50% i to bi radile domaće kompanije u cjelosti, a oprema bi se trebala kupiti jer u Bosni i Hercegovini proizvodnja ovakve opreme danas ne postoji.

U postupku dobivanja saglasnosti ovo je prvi korak koji se ogleda u saglasnosti Općinskog vijeća. Mi moramo ovdje vama prezentirati svaki detalj koji vas interesuje koji bi mogao eventualno izazvati nekakve nelagode ili zabrinutost. Nadalje kantonalna vlada bi potpisala koncesiju i dala poduzeću "ELGRAD" d.o.o. Jajce da koristi objekat narednih 30 godina, odnosno da produži na još 15 godina i u konačnici postaje vlasništvo države odnosno u ovom slučaju vlasništvo MZ Vinac. To je takva zakonska procedura. Također kada se potpiše ugovor o koncesiji radi se i druga projektna dokumentacija prije svega i okolišna studija, pa glavni projekti, priključak na mrežu, zapravo sve što je potrebno da bi ova elektrana dobila građevinsku dozvolu. Ima tu još jako puno posla da se uradi, čak i riblja staza bi bila urađena.

Pozitivni učinci gradnje ovog objekta očituju se u sljedećem:

- Zapošljavanje lokalne operative i industrije tokom izvedbe radova
- Zapošljavanje manjeg broja ljudi na održavanju i upravljanju objektom MHE (1-2 radna mjesta) ili korištenje lokalne komunalne infrastrukture,
- Trajni izvor čiste energije kojim se umanjuje emisija zagađenja u atmosferi iz termoelektrana.

Nakon toga predsjednik radne grupe - Senad Dizdar je otvorio raspravu te pozvao prisutne da iznesu svoja mišljenja.

Mirsad Kasum postavio je pitanje: Mogu li građani MZ Vinac da zabrane gradnju mHE?

Odgovor daje predstavnik projekatara: Ako nešto ljudima prouzrokuju smetnju, mogu. I to zakon predviđa. Trebaju biti objektivni razlozi da bi se nešto zabranilo. Ako zaista projekat nekoga ugrožava npr. iseljavanje stanovništva, u tim slučajevima mogu i treba da se zabrani. Investitor je odlučan da ovu administrativnu proceduru prođe ove godine. Ukoliko uspiju da dođu do građevinske dozvole ove godine, onda će u narednoj godini postojati mogućnost da se zatvori konstrukcija financiranja izgradila ova brana. Ona bi se radila otprilike jednu godinu. Drugi korak je dobijanje koncesije od Kantona, pa pribavljanje okolišne dozvole itd.

Senad Makul je kratko kazao: ljudi mogu na programu Discovery pogledati emisiju o nekoliko njemačkih gradova gdje je na rijeci izgrađeno nekoliko malih hidroelektrana. To je tako lijepo urađeno da su se ljudi naselili tako da to izgleda kao aqua park. Bilo bi dobro skinuti tu emisiju sa Discoverya i pokazati je ljudima. Ne bi bilo loše to pokazati ljudima da vide da to ne izgleda loše već da je to lijepo.

Alija Keško kratko je kazao: Što se tiče ove mini hidrocentrale ovo je odmah pored moje kuće. Zapravo ja sam u Vincu vjerski službenik. Što se tiče mene lično ovo je svakako za

pozdraviti ovaj projekat stim što je već bila centrala i po mom sudu Vinčani bi trebali objeručke prihvatiti pogotovo kad se zna da neće biti oduzimanja poljoprivrednog zemljišta te da je ovo na kraju krajeva još jedan plus u tome da Vinčani ne bi za par godina dolazili zbog Han Skele zbog toga što ona nije nikad skinuta s dnevnog reda.

Elvis Čović je postavio pitanje: Ako se ovo usvoji koliko treba vremena da prođe s izgradnjom mHE? I kada?

Odgovor daje predstavnik investitora : Investitor je odlučan da ovu administrativnu proceduru prođe ove godine. Ukoliko uspiju da dođu do građevinske dozvole ove godine, onda će u narednoj godini postojati mogućnost da se zatvori konstrukcija financiranja i pristupi izgradnji ove male hidroelektrane. Ona bi se radila otprilike jednu godinu. Drugi korak je dobijanje koncesije od Kantona, pa pribavljanje okolišne dozvole itd.

Gospodin Kasum: Pošto je ta mHE u centru Vinca a investitori imaju već jednu mHE u Kasumima gdje ja živim. Moje pitanje glasi hoće li stvarati buku odnosno kakva je čujnost te nove hidrocentrale?

Odgovor daje predstavnik investitora: Što se tiče buke, ove mašine nisu bešumne ali ne prave neku veliku buku, a u okolišnoj dozvoli sve će biti precizno navedeno

Sabahudin Lizalović: Da li će mjesna zajednica Vinac imati procent od tih sredstava ?

Odgovor: Ne. To su namjenska sredstva kantona i općine, 60% Kantonu i 40 % Općini.

Mensud Delić: Pozdravljam sve prisutne. Moja je kuća blizu vode pa me zanima hoće li se nivo vode mijenjati?

Nemam ništa protiv gradnje male centrale.

Odgovor: Bit će to regulirani tok i sve eventualne štete nadoknadit će vlasnik snositi.

Hamdija Osmić: Upravo bi i ja po ovom pitanju. Moja kuća se nalazi u blizini i 2012. godine bila je potpuno potopljena. Ja sam imao štete oko 5000 KM od potopljenja a dobio sam od Opštine 1.200 KM. Ja s tom cifrom nisam bio zadovoljan, te godine je bila velika poplava. Poslije sam dobio saznanje da gospodin Bičakčić, posjeduje neke centrale kod Gornjeg Vakufa, ne znam kakve, nisam išao, i da je navodno u tom momentu tih velikih poplava puštena voda s tih i da su vode Vrbasa uzela veliki zamah sve do moje kuće, i dalje. Ja se nadam da se ovo neće desiti pogotovo što se radi u našem mjestu. Samo bi zamolio da se izgradi podzida oko 1 metar visine i dugo nekoliko metara. I zamolio bi gospodina Bičakčića da mi kaže je li to istina.

Odgovor: prvo ste spomenuli opštinu i da ste dobili 1.200 KM a da ste pretrpili štetu. Općina nije dobila novčana sredstva od viših nivoa za te namjene, odnosno za saniranje nastale štete. Intervencija je izvršena iz raspoloživih sredstava, i u tom trenutku moglo se dati toliko. Objekti i kuće napravljeni u vodnom pojasu ne mogu očekivati saniranje nastale štete, jer općina nesmiije sanirati nastale štete vezane za nelegalnu gradnju kuća i objekata.

Asim Hadžić : ja sam iz Bravnica koliko se objekat uklapa u prostorni plan u odnosu na druge hidrocentrale koje planira da izgradi EP. Koliko će to uticati na zdravlje ljudi?

Odgovor: Služba urbanizma daje mišljenje da li je gradnja male hidrocentrale u skladu s prostornim planom. Kako sam već kazao nekoliko puta, konačnu ocjenu daje Kanton, da li je u skladu s kantonalnim prostornim planom.

Gospodin Delić: prije dvije tri godine čini mi se da je Elektroprivreda dala nešto novca za čišćenje korita. Tu nije bilo koordinacije ni općine ni mjesne zajednice. Posao je dobro urađen, korito je očišćeno i produljeno. Popravljen je i most. Po meni sugestija da se ponovo očisti to korito dok se nije počelo s gradnjom. To bi smanjivalo poplave.

Odgovor: Za rijeku Vrbas je nadležna Agencije za vode sliv Save jer je rijeka Vrbas uvršten u vode prve (I) kategorije u skladu sa Zakonom o vodama. Općina Jajce je finansirala izgradnju mosta, dok svako čišćenje i produbljivanje korita treba biti iskordinirano sa Agencijom za vode sliv Save.

Imamović Mustafa: penzioner iz Vinca, živio sam u Njemačkoj 55 godina i vratio sam se u mjesto, i samo da kažem da podržavam ovaj projekat i drago mi je da će neko nastaviti ovu tradiciju proizvodnje električne energije . Nadam se da će ovaj projekat uspjeti i da neće nanijeti nikakvu štetu. Hvala.

Marko Lučić: pozdravljam sve nazočne, pogotovo predstavnike MZ Vinac. Sada nasupam u svoje osobno ime nemam ovlaštenja da nastupam u ime Elektroprivrede HZ-HB. Želim i da pozdravim i predstavnike investitora i naravno projektante . Ja bih postavio dva pitanja:

1. način čišćenja nanosa koji se stvaraju u akumulaciji.
2. procjenu stogodišnjih voda na profilu brane.

Odgovor daje predstavnik projektanata: Što se tiče stogodišnjih voda – to je mala brana i sve do 15 metara brane rade se procjena stogodišnjih voda. Kroz projekt dali smo preporuku investitoru da ugradi vodomjernu letvu ili da se svakodnevno mjeri vodostaj odnosno količina vode. To je sve navedeno u predstudiji.

Način čišćenja nanosa je također predviđena u predstudiji. Što se tiče nizvodnog dijela predvidjeli smo produbljivali korita između 2-3 metra, pa sve do mosta. Ostaje trajna obaveza čišćenja čišćenja nanosa ispred i ispod brane.

Melisa Kilim: kuća mi je blizu centrale. Svi smo zadovoljni ovim projektom i voljeli bi da ovaj projekat uspije.

Od ostalih predstavnika građanstva nije bilo primjedbi i sugestija.

Nakon rasprave o postavljenim pitanjima i odgovorima svim prisutnima obratila se i predstavnica firma "ELGRAD" d.o.o. Jajce, iz Vinca gđa Čehić:


Pozdravljam sve prisutne. Hvala što ste došli . Drago mi je da ste se odazvali u ovolikom broju da se i sami informišete oko toga. Lizalović Sabahudin samo da odgovorim na ovo pitanje – naša firma planira organizirati jednu ovakvu javnu raspravu s mještanima Vinca.

REZIME:


Na osnovu postavljenih pitanja i nejasnoća vezanih za izgradnju male hidroelektrane može se konstatovati da prisutni nemaju negativan stav vezan za ovaj projekt . Obzirom na iskustvo koje ima investitor u ovoj proizvodnji, saradnje koju investitor ostvaruje sa stanovništvom na lokaciji gdje već ima manje postrojenje izražen je pozitivan stav za izgradnju.

Rasprava završena u 13 sati i 00 minuta.

Radna grupa:



Senad Dizdarević



Zorica Marić



Selmir Avdić